

Rā 4, Te Whānautanga o tō tātou Ariki – Rāapa/Wenerei i te ata

He Karakia mō ngā Rāapa/Wenerei o te "Wā noa iho", o ia rā rānei o te wā o te Whānautanga

I whakakikokikotia te Kupu, ā, noho ana i a mātou, kī tonu i te aroha noa, i te pono, i kite anō mātou i tōna korōria e rite ana ki tō te Tama kotahi i puta mai i te Matua.

Hoani 1.14

E te Atua Matua o te maungārongo
I whānau mai ai tōu tama i roto i te mahakitanga
O te Puhi o Meri
Noho tūturu mai i raro i te Whetū marama
Te tohu o te aroha tapu
Kia whānau hou anō ai mātou
I roto i te Wairua Tapu
Ki tōu Atuatanga, ki tōu rangatiratanga i te rangi
Ko Īhu Karaiti nei tō mātou Ariki. **Āmine.**

Te Kupu a te Atua

Ētahi o ēnei Waiata a Rāwiri, ko rātou e whakarite ana i te Maramataka o te tau rānei, ā, ka mutu ia waiata, ia waiata, i ngā rā katoa o te tau, nā, ko tēnei,

Korōria ki . . .

Te Wiki tuatahi, me ngā Rātapu o te Whānautanga – Waiata 8

- 1 E Ihowā, e tō mātou Ariki,
anō te nui o tōu ingoa i te whenua katoa! •
Pakū ana i a koe tōu korōria ki runga ake i ngā rangi!
- 2 Ū pū i a koe te kaha o te māngai o ngā kōhungahunga,
o ngā mea ngote ū •
hei mea mō ōu hoariri, hei pēhi mō te hoariri, mō te kairapu utu.

- 3 Ka titiro ahau ki āu rangi, ki te mahi a ōu maihao, •
ki te marama, ki ngā whetū, i hangā nei e koe;
- 4 he aha te tangata i maharatia ai e koe, •
te tama rānei a te tangata i tirohia ai ia e koe?
- 5 Nohinohi nei te wāhi i whakaititia iho ai ia e koe i te Atua, •
karaunatia ana ia e koe ki te korōria, ki te hōnore.
- 6 Waiho iho e koe hei kīngi mō ngā mahi a ōu ringa; •
kua waiho e koe ngā mea katoa i raro i ōna waewae;
- 7 ngā hipi katoa, ngā pūru, •
me ngā kīrehe katoa o te pārae;
- 8 te manu o te rangi, me te ika o te moana, •
e tere nei i ngā ara o ngā moana.
- 9 E Ihowā, e tō mātou Ariki, •
anō te nui o tōu ingoa i te whenua katoa!

Te Wiki tuarua, me ngā Rāhina/Mane o te Whānautanga – Waiata 85

- 1 E Ihowā, kua aro mai koe ki tōu whenua, •
kua whakahokia mai e koe a Hākopa i te whakarau.
- 2 Kua murua e koe te kino o tāu iwi, •
kua hīpokina e koe ō rātou hara katoa.
- 3 Kua mutu katoa tōu weriweri; •
kua tahuri kē koe i te āritarita o tōu riri.
- 4 Whakahokia ake mātou, e te Atua o tō mātou whakaoranga; •
meinga hoki kia mutu tōu riri ki a mātou.
- 5 E riri rānei koe ki a mātou ake ake? •
E mauāhara tonu rānei, ki ngā whakatupuranga katoa?

- 6 E kore ianei koe e whakahoki ake i a mātou ki te ora; •
kia hari ai tāu iwi ki a koe?
- 7 E Ihowā, whakakitea mai tāu mahi tohu ki a mātou; •
tukua mai ki a mātou tāu whakaoranga.
- 8 Ka whakarongo ahau ki tā te Atua, ki tā Ihowā, e kōrero ai; •
nō te mea mō te rongō mau āna kōrero ki tāna iwi,
ki tāna hunga tapu hoki; kua ia rātou e hoki ki te wairangi.
- 9 Inā, he tata tonu tāna whakaoranga ki te hunga e wehi ana ki a ia •
kia noho ai te korōria ki tō tātou whenua.
- 10 Kua tūtaki te mahi tohu rāua ko te pono; •
kua kihi ki a rāua te tika me te rongō mau.
- 11 Ka tupu ake te pono i te whenua, •
ā, ka titiro iho te tika i te rangi.
- 12 Āe, ka hōmai e Ihowā te pai, •
ā, ka tukua mai ōna hua e tō tātou whenua.
- 13 Ka haere te tika i mua i a ia, •
hei whakatū i a tātou ki te ara o ōna hīkoinga.

Te Wiki tuatoru, me ngā Rātū/Tūrei o te Whānautanga – Waiata 112

- 1 Whakamoemititia a Ihowā! •
Ka hari te tangata e wehi ana i a Ihowā,
e aro nui ana ki āna whakahau.
- 2 Ka nui ōna uri ki runga ki te whenua; •
ka manaakitia te whakatupuranga o te hunga tika.
- 3 Kei tōna whare te rawa, te taonga; •
ka pūmau tonu tōna tika, ake ake.
- 4 Ka maea ake te mārāma i roto i te pōuri ki te hunga tika; •
he atawhai ia, he aroha, he tika.

- 5 He pono ka whiwhi painga te tangata he atawhai,
he ohaoha tāna mahi; •
ka ū āna kupu i te whakawākanga.
- 6 E kore hoki ia e whakangāueuetia ake ake; •
ka maharatia tonutia te tangata tika ake ake.
- 7 E kore ia e matakū i te rongō kino; •
e ū ana tōna ngākau, e whakawhirinaki ana ki a Ihowā.
- 8 Ka ū tōna ngākau, e kore ia e wehi; •
kia kite rā anō ia i tāna i hiahia ai ki ōna hoariri.
- 9 Kua tuwhaina e ia, kua hoatu ki te hunga rawakore; •
pūmau tonu tōna tika ake ake;
ka ara tōna haona i runga i te korōria.
- 10 Ka kite te tangata kino, ā, ka pōuri;
ka pakiri ōna niho, memeha iho; •
pirau iho te hiahia o te hunga kino.

Te Wiki tuawhā, me ngā Rāapa/Wenerei o te Whānautanga – Waiata 19

- 1 E kōrerotia ana e ngā rangi te korōria o te Atua; •
ā, e whakaaturia ana e te kikorangi te mahi a ōna ringa.
- 2 E puaki ana te reo o tēnā rangi, o tēnā rangi, •
e whakaatu mōhiotanga ana hoki tēnā pō, tēnā pō.
- 3 Kāhore he hamumu, kāhore he kupu, •
kāhore e rangona tō rātou reo.
- 4 Kua puta tā rātou aho ki te whenua katoa, •
ā rātou kupu, ā te pito rā anō o te ao.
Whakatūria ana e ia ki reira te tapenākara mō te rā;

- 5 ā, e puta ana ia me he tāne mārena hou i tōna whare moenga, •
whakaī ana ia,
pērā ana me te tangata kaha e mea ana ki te oma whakataetae.
- 6 Ko tōna putanga kei tētahi pito o te rangi, •
ā whawhe noa ki tētahi pito;
kāhore hoki tētahi mea e ngaro i tōna mahana.
- 7 Tapatahi tonu te Ture a Ihowā, he mea whakatahuri i te wairua; •
pono tonu ngā whakaatu a Ihowā,
e whakawhaiwhakaaro ana i te kūare.
- 8 He tika ngā ako a Ihowā, e whakahari ana i te ngākau,
he mā te whakahau a Ihowā, •
e whakamārama ana i ngā kanohi.
- 9 He mā te wehi ki a Ihowā, pūmau tonu ake ake, •
he pono ngā whakaritenga a Ihowā, tika kau anō.
- 10 Engari, ēnā e hiahiatia ana i te kōura,
āe, i te tino kōura ahakoa maha; •
reka atu i te honi, i te māturuturutanga iho o ngā honikoma.
- 11 Nā ēnā anō tāu pononga i whakatūpatō; •
he nui te utu ki te puritia.
- 12 Ko wai e mātau ana ki ōna hē? •
Whakamākia ōku hara puku.
- 13 Puritia anō tāu pononga kei riro i ngā hara whakakake
hei rangatira mōku; •
ko reira ahau tū tika ai, ā, ka wātea i te hē nui.
- 14 Kia manakohia ngā kupu a tōku māngai; •
me ngā whakaaro o tōku ngākau i tōu aroaro, e Ihowā,
e tōku kāmaka, e tōku kaihoko.

Te Wiki tuarima, me ngā Rāpare/Tāite o te Whānautanga – Waiata 113

- 1 Whakamoemititia a Ihowā! •
Whakamoemititia, e ngā pononga a Ihowā;
whakamoemititia te ingoa o Ihowā.
- 2 Kia whakapaingia te ingoa o Ihowā •
āianeī, ā ake ake.
- 3 Kia whakamoemititia te ingoa o Ihowā i te putanga mai o te rā, •
ā tae noa ki tōna torengitanga.
- 4 Kei runga rawa a Ihowā i ngā iwi katoa; •
kei runga ake i ngā rangi tōna korōria.
- 5 Ko wai te rite ana ki a Ihowā, ki tō tātou Atua, •
kei runga nei tōna nohoanga,
- 6 e whakaiti nei i a ia ki te titiro iho ki ngā mea •
kei te rangi, kei te whenua?
- 7 E whakaara ake ana ia i te iti i roto i te puehu, •
e whakateitei ake ana i te rawakore i roto i te pūranga paru,
- 8 kia whakanohoia ai e ia ki roto ki ngā rangatira, •
ki ngā rangatira o tāna iwi.
- 9 Nāna hoki te pākoko i whai whare ai,
hei whāereere e koa ana ki āna tamariki. •
Whakamoemititia a Ihowā!

Te Wiki tuaono, me ngā Rāmere/Paraire o te Whānautanga – Waiata 20

- 1 Mā Ihowā e whakahoki he kupu ki a koe i te rā o te hē; •
mā te ingoa o te Atua o Hākopa koe e tiaki.

- 2 Māna e tono mai he āwhina mōu i te wāhi tapu, •
e whakaū hoki koe i Hiona.
- 3 Māna e mahara ki āu whakahere katoa, •
e manako ki āu tahunga tinana.
- 4 Māna e hōmai ki a koe tā tōu ngākau e mea ai, •
e whakamana katoa hoki tāu e wawata ai.
- 5 Ka hari mātou ki tāu whakaoranga, ka whakatū hoki
i ō mātou kara i runga i te ingoa o tō mātou Atua. •
Mā Ihowā e whakarite āu īnoi katoa.
- 6 Kātahi ahau ka mātau e whakaora ana a Ihowā
i tāna tangata i whakawahi ai,
ka whakahoki kupu ia ki a ia i tōna rangi tapu, •
me te kaha anō tōna ringa matau ki te whakaora.
- 7 Ko tā ētahi he hāriata, ko tā ētahi he hōiho; •
ko tātou ia ka whakahua i te ingoa o Ihowā, o tō tātou Atua.
- 8 Kua piko rātou, kua hinga •
ko tātou ia kua ara, kua tū ki runga.
- 9 Whakaorangia, e Ihowā; •
kia whakahoki kupu mai te Kīngi ina karanga mātou.

Te Wiki tuawhitu, me ngā Rāhoroi/Hātarei o te Whānautanga – nā Waiata 147

- 12 Whakamoemititia a Ihowā, e Hiruhārama! •
Whakamoemititia tōu Atua, e Hiona!
- 13 Nāna nei hoki i whakakaha ngā tūtaki o ōu tatau; •
manaakitia ana e ia āu tamariki i roto i a koe.
- 14 Nāna anō i mau ai te rongō i roto i ōu rohe; •
nāna koe i mākona ai i te wīti pai rawa.

- 15 E tukua ana e ia tāna kupu ki te whenua; •
tere rawa te rere o tāna kupu.
- 16 E hōmai ana e ia te hukarere, ānō he huruhuru hipi; •
e whakatītāritaria ana te haupapa ānō he pungarehu.
- 17 Makā mai ana e ia tāna hauhunga, ānō he maramara – •
ko wai e tū i mua i tāna mātao?
- 18 E tukua ana e ia tāna kupu, •
ā, whakarewaina ana aua mea;
ka meinga tāna hau kia pupuhi, rere ana ngā wai.
- 19 E whakakitea ana e ia tāna kupu ki a Hākopa; •
āna tikanga, me āna whakaritenga ki a Īharaira.
- 20 Kāhore i pērā tāna hanga ki tētahi iwi; •
kīhai anō āna whakaritenga i mōhiohia e rātou.
Whakamoemititia a Ihowā!

*Waiata Whakamoemiti nā te Kawenata Hou
ko tēnei*

Waiata Whakamoemiti tuatahi

- 1 Ko te Karaiti nei te āhua o te Atua e kore nei e kitea atu, •
ko te whānau mātāmua o ngā mea hanga katoa.
- 2 Nāna hoki ngā mea katoa i hanga,
ngā mea i te rangi me ngā mea i te whenua, •
ngā mea e kitea ana me ngā mea kāhore e kitea,
- 3 ahakoa torōna, ahakoa kawanatanga, ahakoa rangatiratanga,
ahakoa mana. •
Nāna, ā, mōna te hanganga o ngā mea katoa.
- 4 Nō mua anō hoki ia i ngā mea katoa, •
nāna anō hoki ngā mea katoa i mau ai.

5 Ko ia anō te ūpoko o te tinana, arā o te hāhi. •

Ko ia te tīmatanga, ko te whānau mātāmua i roto i te hunga mate;
kia waiho ai ia hei tuatahi i roto i ngā mea katoa.

6 Ko tā te Matua tērā i pai ai,

kia noho te huanga o ngā mea katoa ki roto ki a ia; •

kia mā roto ai i a ia he houhanga rongō mō ngā mea katoa ki a ia,

7 kua mau nei i a ia te rongō i ngā toto o tōna rīpeka; •

āe rā, mā roto i a ia,

ahakoa he mea nō te whenua, ahakoa he mea nō te rangi.

Korohe 1.15-20

Korōria ki . . .

ko tēnei rānei

Waiata Whakamoemiti tuarua

1 I te tīmatanga te Kupu, i te Atua te Kupu, •

ko te Atua anō te Kupu.

2 I te Atua anō tēnei Kupu •

i te tīmatanga.

3 Nāna ngā mea katoa i hanga; •

kāhore hoki tētahi mea i kore te hanga e ia o ngā mea i hangā.

4 I a ia te ora; •

ko te ora te mārama mō ngā tāngata.

5 I roto i te pōuri te mārama e whiti ana; •

heoi kīhai i mau i te pōuri.

6 I te ao ia, i hanga anō e ia te ao, •

ā, kīhai te ao i mōhio ki a ia.

7 I haere mai ia ki ōna, •

ā, kīhai ōna i manako ki a ia.

- 8 Tēnā ko te hunga i manako ki a ia i tukua e ia ki a rātou ngā tikanga e meinga ai rātou hei tamariki mā te Atua, • arā ki te hunga e whakapono ana ki tōna ingoa.
- 9 Ki te hunga ehara nei i te toto, ehara i tā te kikokiko i pai ai, • ehara i tā te tangata i pai ai, engari, nā te Atua i whānau ai.
- 10 I whakakikokikoa te Kupu, ā, noho ana i a mātou, • i kite anō mātou i tōna korōria he korōria e rite ana ki tō te Tama kotahi a te Matua, kī tonu i te aroha noa, i te pono.
- 11 Kua riro hoki i a tātou katoa tētahi wāhi o tōna raneatanga, • te aroha noa hono iho ki te aroha noa.

Hoani 1.1-5, 10-14, 16

Korōria ki . . .

Ngā Pānui Karaipiture

ko tētahi o ēnei pānui, ko tētahi nō te Maramataka o te tau rānei

Te Wiki tuatahi, me ngā Rātapu o te Whānautanga

Ka mea te Atua ki a Noa, “Ā, ka whakapūmautia e ahau tāku kawenata ki a koutou; e kore e hātepea atu ngā kikokiko katoa ā muri ake nei e ngā wai o te waipuke; e kore anō e puta mai he waipuke ā muri ake nei hei whakangaro i te whenua. Ko te tohu tēnei o te kawenata, e whakatakotoria nei e ahau ki waenganui ōku, o koutou tae atu ki ngā mea ora katoa i a koutou, mō ngā whakatupuranga mutungakore: ka whakatakotoria e ahau tāku kōpere ki te kapua, ā, ka waiho hei tohu mō te kawenata i waenganui ōku, o te whenua.”

Kenehi 9.11-13

Te Wiki tuarua, me ngā Rāhina/Mane o te Whānautanga

Nā, e mātau ana tātou, kei te mahi tahi ngā mea katoa i te pai mō te hunga e aroha ana ki te Atua, arā mō te hunga i karangatia i runga i tāna i whakatakoto ai. Ko āna hoki i mōhio ai i mua, i whakaritea anō

e ia i mua kia rite ki te āhua o tāna Tama, kia ai ia hei muanga i roto i ngā tēina tokomaha. Ā, ko āna i whakarite ai i mua, ko ēnā anō i karangatia e ia; ā, ko āna i karanga ai, ko ēnā anō i whakatikaia e ia; ā, ko āna i whakatika ai, ko ēnā anō i whakakorōriatia e ia.

Rōma 8.28-30

Te Wiki tuatoru, me ngā Rātū/Tūrei o te Whānautanga

Ka mea a Mohi, “Ko reira koe oho atu ai, mea ai ki te aroaro o Ihowā, o tōu Atua, ‘Ko tōku matua he Hīriani, i ora noa i te mate; ā, haere ana ia ki raro, ki Īhipa, ā, noho ana i reira, he hunga torutoru; nā, meinga ana ia hei iwi nui i reira, he kaha, he tini. Nā, tūkinotia ana mātou e ngā Īhipiana, whakawhiua ana mātou, ā, he kino tā rātou whakamahinga i a mātou, ā, ka tangi mātou ki a Ihowā, ki te Atua o ō mātou matua, nā, whakarongo mai ana a Ihowā ki tō mātou reo, titiro mai ana ki tō mātou whakawhiunga, ki tō mātou whakamahinga, ki tō mātou tūkinotanga. Nā, whakaputaina mai ana mātou e Ihowā i Īhipa ki te ringa kaha, ki te tākakau mārō tonu, me te whakamataku nui, me ngā tohu, me ngā merekara; ā, kawea mai ana mātou e ia ki tēnei wāhi, ā, hōmai ana ki a mātou tēnei whenua, he whenua e rerengia ana e te waiū, e te honi.’ ”

Tiuteronomi 26.5-9

Te Wiki tuawhā, me ngā Rāapa/Wenerei o te Whānautanga

Ka mea a Mohi, “Ko tēnei ture hoki, e whakahau nei ahau i tēnei rā ki a koe, ehara i te mea pakeke rawa ki a koe, i te mea tawhiti rānei. Kāhore i te rangi, e mea ai koe, ‘Ko wai o tātou hei piki ki te rangi ki te tiki atu i tēnā mea mā tātou, hei mea kia rongu atu tātou, kia mahi ai tātou?’ Kāhore i tāwāhi o te moana, hei meatanga māu, ‘Ko wai o tātou hei whakawhiti ki tāwāhi o te moana, ki te tiki i tēnā mea ki a tātou, hei mea kia rongu atu tātou, kia mahi ai tātou?’ Kei te tata tonu rā te kupu ki a koe, kei roto i tōu waha, kei roto hoki i tōu ngākau, mō tāu mahi atu.”

Tiuteronomi 30.11-14

Te Wiki tuarima, me ngā Rāpare/Tāite o te Whānautanga

Kia noho nui te kupu a te Karaiti i roto i a koutou i runga i te mātauranga katoa; me whakaako, me whakatūpato tētahi e tētahi ki ngā waiata tapu, ki ngā hīmene, ki ngā waiata wairua, me te waiata anō ki te Atua i runga i te aroha noa, i roto i ō koutou ngākau. Ko ngā mea katoa hoki e mea ai koutou, ko ngā kupu, ko ngā mahi rānei, kia meinga katoatia i runga i te ingoa o te Ariki, o Īhu, me te whakawhetai anō ki te Atua, arā ki te Matua i roto i a ia.

Korohe 3.16-17

Te Wiki tuaono, me ngā Rāmere/Paraire o te Whānautanga

Ko tō koutou haerenga mai ki a ia ki te kōhatu ora, i whakakāhoretia nei e ngā tāngata, he mea whiriwhiri ia nā te Atua, he mea utu nui; ka hangā hoki koutou, ānō he kōhatu ora hei whare, arā hei mea wairua, hei tohungatanga tapu, hei tāpae atu i ngā patunga tapu, arā i ngā mea wairua, he mea e manakohia ana e te Atua i runga i a Īhu Karaiti. Mō reira, tērā wāhi o te karaipiture: “Nā, ka whakatakotoria e ahau ki Hiona te tino kāmaka o te kokonga, he mea whiriwhiri, he mea utu nui, ā, ko te tangata e whakapono ana ki a ia e kore e tukua kia whakamā.”

1 Pita 2.4-6

Te Wiki tuawhitu, me ngā Rāhoroi/Hātarei o te Whānautanga

He maha ngā wāhi, he maha ngā huarahi i kōrero ai te Atua i mua, arā ngā poropiti, ki ngā mātua, i ēnei rā whakamutunga nā tāna Tama āna kōrero ki a tātou, ko tāna hoki tērā i mea ai māna ngā mea katoa, ko tāna kaihangā hoki tērā o ngā ao. Ko ia te kānapatanga o tōna korōria, te tino āhua o tōna pūmautanga, e whakaū nei i ngā mea katoa ki te kupu o tōna kaha, ka oti i a ia ake anō te horoi ō tātou hara, nā noho ana ia i te ringa matau o te Nui i runga rawa. Ā, meinga ana ia kia pai ake i ngā anahera, kia pērā me te ingoa i riro i a ia he nui atu i tō rātou.

Hiperu 1.1-4

Te Waiata a Hakaraia

Kiānga mō ngā rā noa iho

E te Atua, kua puta atu tōu kupu taurangi kia mahara ki tōu kawenata tapu •

ā, ka whakaarahia ake e koe he kaiwhakaora tino kaha mō mātou.

Kiānga mō te wā o te Whānautanga o te Karaiti, rānei

I whānau ai he kaiwhakaora mō mātou, arā a te Karaiti te Ariki, •

ā, ko tētahi ope nui o te rangi e waiata ana,

Korōria ki te Atua i runga rawa!

Kiānga mō ngā rā o te Puhi Tapu, o Meri, rānei

I roto i te kōpū o Meri,

ka rapu hei nohoanga i runga i te whenua, e te Karaiti; •

kia noho pūmau i ō mātou ngākau mō ake tonu atu.

✘ Kia whakapaingia te Ariki, te Atua o Īharaira: •

kua titiro mai hoki ia, kua hoko i tāna iwi.

Kua whakaarahia ake e ia he haona whakaora mō tātou: •

i roto i te whare o Rāwiri, o tāna pononga.

Ko tāna hoki ia i kōrerotia e te māngai o āna poropiti tapu: •

nō te tīmatanga iho anō o te ao:

Hei whakaora i a tātou i ō tātou hoa whawhai: •

i te ringa anō o te hunga katoa e kino ana ki a tātou;

Hei whakaputa i te mahi tohu ki ō tātou tūpuna: •

hei whakamahara ki tāna kawenata tapu;

Ki te oati i oati ai ia ki a Āperahama: •

ki tō tātou tupuna.

Kia tukua mai e ia ki a tātou he ora

i te ringa o ō tātou hoa whawhai: •

kia mahi wehikore tātou ki a ia,

I runga i te tapu, i te tika, ki tōna aroaro: •

i ngā rā katoa e ora ai tātou.

Ā, ko koe, e tama, ka kīia ko te poropiti a te Runga rawa: •

e haere hoki koe i te aroaro o te Ariki, hei whakapai i ōna ara;

Hei whakamātau i tāna iwi ki te ora: •

i ō rātou hara e murua ana;

He mea hoki nā te aroha, nā te mahi tohu a tō tātou Atua: •

nā reira hoki i puta mai ai te pūaotanga o runga ki a tātou,

Hei whakamārama i te hunga e noho ana i te pōuri, i te ātārangi hoki o te mate: •

hei whakatika i ō tātou waewae ki te huarahi o te rangimārie.

Ruka 1.68-79

Kia whakakorōriatia te Matua, te Tama: •

me te Wairua Tapu;

ko te ritenga ia i te tīmatanga, ā tēnei anō ināiane: •

ā ka mau tonu iho, ā ake ake. Āmine.

ko tēnei rānei

Korōria ki te Matua, ki te Tama,

ki te Wairua Tapu; •

mai i te tīmatanga, ki tēnei wā,

ā, haere ake nei. Āmine.

Kiānga anō

Ngā Īnoi

Ngā Īnoi takawaenga me ngā whakawhetai

E te Ariki, kia aroha mai.

E te Karaiti, kia aroha mai.

E te Ariki, kia aroha mai.

Te Īnoi mō te rā, te Īnoi mō te Rāapa/Wenerei, te Īnoi mō te Whānautanga rānei

Te Īnoi mō te Rāapa/Wenerei

E te Atua kaha rawa,
tukua mai ana e koe tāu Tama kotahi
kia whakatangatatia ai,
kia whānau mai ai i te Puhi i a Meri;
tukua mātou, kua whānau mai anō,
kua taurimatia ki tōu aroha noa hei tamariki māu,
kia whakahōutia ai ki tōu Wairua Tapu ia rā, ia rā;
ko Īhu Karaiti tō mātou Kaiwhakaora,
e ora ana, e kīngi tahi ana me koe me te Wairua Tapu,
kotahi anō Atua āiane i ā ake tonu atu.

Āmine.

Te Īnoi mō te Whānautanga

E te Atua kaha rawa,
harikoa ana mātou i a koe i te whakanuitanga ā tau
o te whānautanga mai o tāu Tama, o Īhu Karaiti,
te mārama o te ao;
tukua mātou,
e mōhio nei ki te whakakitenga o taua mārama i runga i te whenua,
kia kite ai i tōu korōria e tīaho mai ana i te rangi;
ko Īhu Karaiti tō mātou Ariki,
e ora ana, e kīngi tahi ana me koe me te Wairua Tapu,
kotahi anō Atua, āiane i ā ake tonu atu.

Āmine.

Te Īnoi a te Ariki

E harikoa ana i te taenga o te Atua i waenganui i a tātou, ā,
kua akona nei tātou e tō tātou Ariki, ka Īnoi tātou.

E tō mātou Matua i te rangi

Kia tapu tōu Ingoa.

Kia tae mai tōu rangatiratanga.
Kia meatia tāu e pai ai
ki runga ki te whenua,
kia rite anō ki tō te rangi.
Hōmai ki a mātou āiane
he taro mā mātou mō tēnei rā.
Murua ō mātou hara,
Me mātou hoki e muru nei
i ō te hunga e hara ana ki a mātou.
Aua hoki mātou e kawea kia whakawaia;
Ēngari whakaorangia mātou i te kino:
Nōu hoki te rangatiratanga, te kaha,
me te korōria,
Ake ake ake. Āmine.

Te manaakitanga

✘ Mā te Atua o te tūmanako,
e whakaū ō tātou ngākau
ki te koa, ki te rangimārie
kia pono ai tātou,
i runga i te ihi, i te mana,
o te Wairua Tapu. Āmine.

I te wā o te Whānautanga, ko tēnei rānei:

✘ Kia tau ki a tātau katoa te atawhai o te Karaiti tō tātau
Kaiwhakaora.
Āmine.

Kia whakapaingia te Ariki.
Ki te Atua ia te whakawhetai.